



Satisfatgs da pudair preschentar il nov med d'instrucziun davart il rumantsch. Da san. Arno Berther, Lea Berther e Harry Heuser.

FOTO M. CABALZAR

# Allegra rumantsch

Sentupada cun la Svizra rumantscha en in nov med didactic

■ (mc) **Cun l'edizium dal nov med d'instrucziun «Allegra rumantsch – eine Begegnung mit der rätoromanischen Schweiz» envida la Pro Svizra Rumantscha ad emprender a conuscher ils Rumantschs, lur vita, surtut dentant lur lingua e cultura.** Sco quai ch'il parsura da la Pro Svizra Rumantscha *Arno Berther* ha accentuà a la preschentanaziun ier a Flem na devi fin oz betg in med d'instrucziun specific sur dal rumantsch. Quai fuvia davairas ina gronda mancanza. «Ina minoritad viva mo lur bain, sche ella è preschenta en la publicitad e chapescha da sensibilisar l'ulteriura populaziun per lur basegns e giavischs», ha ditg Arno Berther. E nagut saja pli adattà per cuntanscher questa finamira che la scola.

## Med attractiv per far gust da tractar il tema rumantsch

Cun il med «Allegra rumantsch – eine Begegnung mit der rätoromanischen Schweiz» vul la PSR far gust a magistras e magisters da tractar il tema «rumantsch» en scola. Il nov med facilitescha ad els da s'avischinar a quest tema e da far surlonder senza gronda fadia ina instrucziun bain chapaipla ed attractiva. Las scolaras ed ils scolars acquistan qua tras interessantas invistas en il mund rumantsch e vegnan sensibilisads per la situaziun specifica d'ina minoritad linguistica. Tut conform a l'artigel da linguas en la costituziun federala contribuescha il med d'instrucziun a promover la chapientscha tranter las communitads linguisticas e qua tras betg il pli davos er a mantegnair ina Svizra quadrilingua. Il

med d'instrucziun veglia dentant er gidar a curreger pregiudizis e clischés, manaja Arno Berther. Rumantsch saja dapli che ina lingua moribunda. Il cuntrari, el viva e vegn vivì, el è sa sviluppà e sa transformà, ha fatg tras svilups moderns ed è en bleras parts dal Grischun ina realitad. «Ir suentar als fastiz da la pli pitschna da las quatter linguas naziunalas vala la paina», è Berther persvadi.

## Per il stgalim aut

Sco quai che l'autura dal nov med d'instrucziun *Lea Berther* punctuescha è Allegra in med d'instrucziun adattà per il stgalim aut da la scola populara e per las scolas medias. Sumegliant ad ina carta da menu possia la persuna d'instrucziun metter ensemen or da quel ina retscha da lecziuns individuala che correspunda als interess e basegns da sia classa. En ina versiun minimala po il tema

vegnir tractà en 12 lecziuns (modul da basa e da finiziun). La savida possia alur vegnir schlargiada cun tractar ulteriurs moduls a schelta libra. Perquai statan a disposiziun tenor il maletg aschuntà 15 posts da lavuratori davart las tematicas «minoritad e maioritad», «ils Rumantschs e lur bilinguitad», «migraziun», «unitad e diversitad» sco er «tradiziun e moderna». Ultra da quai cuntegn il med d'instrucziun er in pign curs da lingua sco er in modul davart la cuschina rumantscha.

Tenor *Harry Heuser* da la chasa editura Klett e Balmer cumpara il med en furma da dc per uschia satisfar als basegns d'ina instrucziun moderna. Il med cuntegn er differents texts auditivs.

**Allegra rumantsch – Eine Begegnung mit der rätoromanischen Schweiz.** Klett e Balmer 2006. Pretsch 29 francs.



Structura dal nov med d'instrucziun Allegra.